



R E P U B L I K A E S H Q I P È R I S È
AUTORITETI I KONKURRENCËS
KOMISIONI KONKURRENCËS

Nr. 74/9 prot.

Tiranë, më 29.03.2024

VENDIM

Nr. 1068, Datë 29.03. 2024

“MBI AUTORIZIMIN E PËRQENDRIMIT TË REALIZUAR NËPËRMJET PËRFITIMIT TË KONTROLLIT TË SHOQËRISË EUROSIG SHA NGA SHOQËRIA EURO-ALBA-EA SHPK”

Komisioni i Konkurrencës me pjesëmarrjen e:

Znj.	Leida MATJA	Zv/Kryetar
Znj.	Adriana BERBERI	Anëtar
Znj.	Rezana KONOMI	Anëtar
Z.	Durim KRAJA	Anëtar

Në mbledhjen e tij të datës 29.03.2024, shqyrtoi çështjen me:

Objekti: Autorizimi i përqendrimit të realizuar nëpërmjet përfitimit të kontrollit të shoqërisë EUROSIG SHA nga shoqëria EURO-ALBA-EA SHPK.

Baza Ligjore: Nenet 2, 10-12, nen 24, germa d, dhe nenet 53-64 të ligjit nr. 9121, datë 28.07.2003 “Për mbrojtjen e konkurrencës”; Rregullorja “Për zbatimin e procedurave të përqendrimit të ndërmarrjeve”; Udhëzimi “Për formën e njoftimit të përqendrimit”; Udhëzimi “Mbi kontrollin e përqendrimeve ndërmjet ndërmarrjeve” dhe Formulari i njoftimit të përqendrimit.

Komisioni i Konkurrencës, pas shqyrtimit të relacionit të Sekretarit të Përgjithshëm, si dhe raportit të Drejtorisë së Analizës dhe Metodologjisë së Tregjeve mbi njoftimin e përqendrimit të realizuar nëpërmjet përfitimit të kontrollit të shoqërisë EUROSIG SHA nga shoqëria EURO-ALBA-EA SHPK,

VËREN SE :

I. Palët në transaksion dhe procedura

Pranë Autoritetit të Konkurrencës u depozitura njoftimi mbi zmadhimin e kapitalit të shoqërisë EUROSIG SHA dhe ndryshimin e pjesëmarrjes së aksionarëve ekzistues të kësaj shoqërie.

Referuar dokumentacionit të depozituar nga pala njoftuese, palët në transaksion janë:

EURO-ALBA-EA SHPK është një shoqëri me përgjegjësi të kufizuar, e themeluar sipas legjislacionit shqiptar, me objekt të aktivitetit të saj tregtimin e artikujve ushqimorë, industrialë, import-eksport të mallrave, transportim i mallrave dhe pasagjerëve në linja urbane dhe ndërkontinentale, veprimtari në fushën e turizmit, të investimeve themelore duke marrë pjesë me mjetet e veta, veprimtari në fushën e prodhimit dhe të tregtisë së bukës dhe të prodhimeve të tjera ushqimore, shfrytëzim / tregtim dru zjarri e lëndë druri, materiale ndërtimi, tregtim çimento e gëlqere; prodhim, përpunim, mobilim dhe tregtim të prodhimeve, mallrave e materialeve duralumini, plastike, druri e guri, të materialeve të ndërtimit etj.

EURO-ALBA-EA SHPK zotërohet 100% nga z. Gazmen Neza.

EUROSIG SHA është një shoqëri aksionare, e themeluar sipas legjislacionit shqiptar, e cila ka për objekt të veprimtarisë së saj ushtrimin e veprimtarisë së sigurimit dhe ri sigurimit, nëpërmjet përgatitjes, ofrimit, nënshkrimit dhe zbatimit të kontratave të sigurimit “Jo-Jetë”, sipas termave dhe klasave të përcaktuara në Ligjin Nr.52/2014 “Për veprimtarinë e sigurimit dhe ri sigurimit”, akteve të tjera normative dhe për të cilat është e licencuar nga Autoriteti i Mbikëqyrjes Financiare, me licencën Nr. 7/2004, datë 22.06.2012.

EUROSIG SHA përpara transaksionit zotërohej: 58.207% nga z. Kadri Morinaj, 15.819% nga z. Xhevdet Morina, 0.281% nga z. Ylli Merkaj dhe **25.693% nga shoqëria EURO-ALBA-EA SHPK**.

EUROSIG SHA zotëron në mënyrë të drejtpërdrejtë 99.46% në Bankën e Bashkuar të Shqipërisë, 100% shoqërinë INSIG SH.A, 100% shoqërinë INSIG JETE SH.A; në mënyrë të tërthortë 100% shoqëritë EUROCREDIT SHPK dhe EUROSIG INVEST-Shoqëri Administruese e Fondeve të Pensionit Privat dhe Sipërmarrjeve të Investimeve Kolektive SHA (shoqëri me status pezulluar sepse është ende në proces licencimi). EUROSIG SHA operon në Kosovë nëpërmjet shoqërisë së zotëruar prej saj, EUROSIG KOSOVË SHA.

II. Përqendrimi

Me datë 22.12.2023, shoqëria EURO-ALBA-EA SHPK, me anë të vendimit të ortakut të vetëm, Z. Gazmen Neza, ka vendosur të kontribuojë në kapitalin themeltar të shoqërisë EUROSIG SHA, nëpërmjet kontributeve në mjete monetare, për shumën e 1,750,000,000 leke.

Me Vendimin nr. 21, datë 26.12.2023, Asambleja e Aksionarëve të shoqërisë EUROSIG SHA, ka vendosur: 1. Të miratojë zmadhimin e kapitalit të shoqërisë EUROSIG SHA nëpërmjet emetimit të aksioneve të reja, në vlerën e 1,750,000,000 lekë, të pagueshme me kontribute në mjete monetare, nga aksionari ekzistues, shoqëria EURO-ALBA.EA SHPK, duke e rritur kapitalin e shoqërisë nga 2,765,650,000 lekë në 4,515,650,000 lekë; 2. Të miratojë ndryshimet që vijnë si rezultat i kësaj rritje kapitali të paguar në mjete monetare, në numrin e aksioneve, si dhe vlerat e pjesëmarrjeve aksionare dhe kapitalin themeltar aksionar të shoqërisë EUROSIG SHA.

Me Vendimin nr. 21/1, datë 26.12.2023, Asambleja e Aksionarëve të shoqërisë EUROSIG SHA, ka vendosur që në statutin e shoqërisë EUROSIG SHA të ndryshohet neni 7, i cili pas ndryshimeve do të formulohet si vijon: Kapitali themeltar i shoqërisë është 4,515,650,000 lekë. Ai është i ndarë në 451,565 aksione të themeluesve të shoqërisë, të cilat janë të së njëjtës kategori me vlerë 10,000 lekë, për çdo aksion. Pjesëmarrja e aksionarëve në kapitalin themeltar të shoqërisë do të jetë:

54.49% shoqëria EURO-ALBA-EA SHPK, 35.65% z. Kadri Morinaj, 9.69% z. Xhevdet Morina dhe 0.17% z. Ylli Merkaj.

Referuar Statutit të shoqërisë EUROSIG SHA, organet e shoqërisë janë: a) Asambleja e Përgjithshme e Aksionarëve, b) Këshilli Mbikëqyrës dhe c) Drejtori i Përgjithshëm /Administratori.

Asambleja e Përgjithshme merr vendime për çështjet të tilla si ndryshime në statut, emërimin dhe shkarkimin e anëtarëve të Këshillit Mbikëqyrës, përcaktimin e politikave tregtare, emërimin dhe shkarkimin e administratorit, zmadhimin ose zvogëlimin e kapitalit, etj., me shumicën e votave të aksionarëve, që marrin pjesë.

Këshilli Mbikëqyrës i EUROSIG SHA përbëhet nga 3 anëtarë dhe merr vendime për zbatimin e legjislacionit në fuqi nga shoqëria e sigurimit; raportimin dhe informimin e Autoritetit Mbikëqyrës sipas dispozitave të ligjit nr.52/2014 “Për veprimtarinë e sigurimit dhe ri sigurimit”; përgatit me kërkesë të Asamblesë së Përgjithshme marrjen e masave që janë në kompetencë të kësaj të fundit, i rekomandon asaj vendime të nevojshme për t'u marrë, si dhe zbaton vendimet e Asamblesë; thërrret mbledhjen e Asamblesë së Përgjithshme sa herë vlerësohet e nevojshme në funksion të interesave të shoqërisë, etj.

Mbështetur në përqindjen e aksioneve të zotëruara nga shoqëria EURO-ALBA-EA SHPK pas kontributit në kapitalin e shoqërisë, si dhe vendimmarjen nga organet drejtuese të shoqërisë, vlerësojmë se transaksi i njoftuar konsiston në ndryshimin e kontrollit të shoqërisë EUROSIG SHA dhe përfimin e kontrollit nga shoqëria EURO-ALBA-EA SHPK , transaksion i cili është në përputhje me nenin 10 dhe 12 të ligjit nr. 9121, datë 28.07.2003, “Për mbrojtjen e konkurrencës”.

III. Analiza e Konkurrencës

Sipas nenit 3, pika 7, të ligjit nr. 9121, datë 28.07.2003 “Për mbrojtjen e konkurrencës”, si edhe Udhëzimit nr.76, datë 07.04.2008 “Për përcaktimin e tregut përkatës”, treg përkatës i produktit do të konsiderohet tregu i sigurimeve (sigurimi i jetës dhe i jo jetës). Treg përkatës gjeografik do të konsiderohet territori i Republikës së Shqipërisë.

a) Struktura e tregut

Tregu i sigurimeve funksionon në zbatim të ligjit nr. 52, datë 22.05.2024 “Për veprimtarinë e sigurimit dhe ri sigurimit” dhe Autoriteti i Mbikëqyrjes Financiare (AMF) është autoritet mbikëqyrës dhe rregulator i integruar i tregut të sigurimeve, të titujve, të sipërmarrjeve, të investimeve kolektive dhe të pensioneve private vullnetare në Shqipëri.

Referuar të dhënave të raportit vjetor të AMF-së konstatohet se gjatë vitit 2022 në tregun e sigurimeve ushtruan veprimtarinë e tyre 12 shoqëri sigurimi Jetë dhe Jo-Jetë, nga të cilat katër shoqëri sigurimesh ushtrojnë veprimtarinë e tyre në sigurimet e Jetës dhe tetë shoqëri sigurimesh ushtrojnë veprimtarinë e tyre në sigurimet e Jo-Jetës.

Shoqëria target, EUROSIG SHA, në mënyrë të drejtpërdrejtë dhe nëpërmjet shoqërive të kontrolluara prej saj, ushtron aktivitetin në tregun e sigurimit të Jetës dhe Jo-Jetës.

Tregu i sigurimit të Jo-Jetës.

Sipas nenit 4, pika 39 të ligjit, “Sigurim jo-jete” është sigurimi i rrezikut, i cili përfshin sigurimin e aksidenteve, sigurimin e sëmundjeve, sigurimin e mjeteve tokësore, sigurimin e mjeteve lëvizëse mbi shina, sigurimin e anijeve, etj.

Referuar vlerës së primeve të shkruara bruto gjatë vitit 2022 konstatohet rritje me 8.51% të primeve krahasuar me vitin 2021, të cilat erdhën kryesisht nga portofoli i sigurimit të detyrueshëm motorik, me rrith 80.35% e totalit të primeve në sigurimin e Jo-Jetës.

Në produktin e sigurimit të Jo-Jetës, shoqëria EUROSIG SHA ofron shërbimet vetë dhe nëpërmjet shoqërisë INSIG SHA. Sipas treguesit të primeve të shkruara bruto rezulton se pjesa e tregut e shoqërisë EUROSIG SHA gjatë dy viteve 2021-2022 dhe periudhës janar-shtator 2023 është 13%, ndërkohë që për shoqërinë INSIG SHA pjesa e tregut për të njëjtën periudhë është në vlerën 7%.

Tregu i sigurimit të jetës.

Sipas nenit 4, pika 38 të ligjit “Sigurim jete” është sigurimi i rrezikut, i cili përfshin: sigurimi i jetës, sigurimi martesë – lindje, sigurimi i jetës i lidhur me sipërmarrjet e investimeve kolektive, anuitetet (lloj pensioni), sigurimi shtesë i cili lidhet me kontratën e sigurimit të jetës, etj.

Në tregun e sigurimeve të Jetës ushtrojnë veprimtarinë e tyre 4 shoqëri. EUROSIG SHA, nëpërmjet shoqërisë së kontrolluar prej saj INSIG JETE SHA, ofron shërbimin e sigurimit të jetës.

Sipas të dhënave mbi primet e nënshkruara për sigurimin e jetës për periudhën 2021-2022 rezulton se pjesa e tregut e shoqërisë INSIG JETE SHA gjatë vitit 2021 ka qenë 15% me një trend rritës në vitin 2022 drejt vlerës 18%. Referuar të dhënave të AMF mbi primet e shkruara bruto, për periudhën janar – shtator 2023, pjesa e tregut të INSIG JETE SHA është 23%.

b) Efektet e përqendrimit.

Shoqëria EURO-ALBA-EA SHPK ushtron aktivitetin kryesisht në sektorin e ndërtimit, prodhim, përpunim, tregtim të mallrave e materialeve të ndërtimit (pavarësisht se objekti i veprimtarisë së saj është më i gjërë, ku përfshihen dhe aktivitetet në sektorët e tregtisë së artikujve ushqimore, industrialë, import – eksport të mallrave, etj.).

Referuar Udhëzimit “Për vlerësimin e përqendrimeve jo horizontale dhe konglomerate”, konstatohet se transaksi i njoftuar përbën një përqendrim konglomerat, pasi përqendrimet konglomerate ndodhin kur ndërmarrjet që marrin pjesë në përqendrim nuk kanë as marrëdhënie horizontale (si konkurrentë në të njëtin treg përkatës) dhe as vertikale (si prodhues edhe klientë). Palët në transaksion operojnë në tregje të ndryshme.

Në përgjithësi, përqendrimet jo-horizontale nuk përbëjnë një kërcënim për konkurrencën efektive, vetëm nëse njësia e përqendruar ka një shkallë të konsiderueshme të fuqisë në treg në të paktën një nga tregjet përkatëse, por kjo nuk do të thotë se njësia e përqendruar duhet të ketë pozitë dominuese. Referuar strukturës së tregut konstatohet se shoqëria EUROSIG SHA, për 9-mujorin e vitit 2023, zotëron rrith 20% të tregut të sigurimit të Jo-Jetës dhe 23% të tregut të sigurimit të Jetës.

Problemi kryesor në përqendrimet konglomerate është ai i përjashtimit nga tregu. Kombinimi i produkteve në tregjet e lidhura, mund t’i japë njësisë së përqendruar mundësinë dhe ta nxitë që të

transmetojë një pozicion tregu të fuqishëm nga një treg në një tjetër me anë të praktikave kushtëzuese ose praktikave të tjera përjashtuese (të lidhura).

Referuar objektit të aktivitetit të palëve në transaksion, veprimtaria e EUROSIG SHA në tregun e sigurimit (jete dhe jo-jetë) është e ndarë nga aktivitetet e ndryshme tregtare që kryen EURO-ALBA-EA SHPK, pra tregjet përkatëse ku operojnë shoqëritë janë të ndryshme dhe nuk evidentohen tregje apo produkte të lidhura nga palët në transaksion.

Fushat e veprimtarisë së palëve pjesëmarrëse në transaksion janë të ndryshme nga njëra – tjetra dhe për këtë arsye ky përqendrim nuk pritet të ketë ndikim në asnjërin prej tregjeve në të cilin operon secila nga shoqëritë. Transaksi i pritet të mos sjellë shqetësimë për konkurrencën në treg, duke mos ndikuar në përjashtimin e konkurrentëve të tjera nga tregu.

Sa më sipër, Komisioni i Konkurrencës konstaton se ky përqendrim nuk shfaq shenja të kufizimit të konkurrencës në treg ose në një pjesë të tij në veçanti, si rezultat i krijimit ose forcimit të pozitës dominuese.

PËR KËTO ARSYE:

Komisioni i Konkurrencës, në bazë të nenit 24, shkronja d dhe nenit 56 pika 1 të ligjit nr. 9121, datë 28.07.2003 “Për mbrojtjen e konkurrencës”,

VENDOSI:

1. Të autorizojë përqendrimin e realizuar nëpërmjet përfimit të kontrollit të shoqërisë EUROSIG SHA nga shoqëria EURO-ALBA-EA SHPK.
2. Ngarkohet Sekretari i Përgjithshëm për njoftimin e palëve dhe dërgimin e vendimit pasi të bëhen pagesat që parashikon rregullorja “Për caktimin e shpenzimeve për ndjekjen e procedurave pranë Autoritetit të Konkurrencës”.

Ky vendim hyn në fuqi menjëherë.

KOMISIONI I KONKURRENCËS



Leida MATJA

Zv/Kryetar

Rezana KONOMI

Anëtar

Adriana BERBERI

Anëtar

Durim KRAJA

Anëtar